



MEMORIA XUSTIFICATIVA DO CONVENIO DE COLABORACIÓN ENTRE A VICEPRESIDENCIA E CONSELLERÍA DE PRESIDENCIA, ADMINISTRACIÓNS PÚBLICAS E XUSTIZA E O COLEXIO OFICIAL DE ARQUITECTOS DE GALICIA NO DESENVOLVEMENTO DUN CONCURSO DE IDEAS, CON INTERVENCIÓN DE XURADO, PARA A REDACCIÓN DO ANTEPROXECTO DE ADAPTACIÓN DO COMPLEXO DO ANTIGO HOSPITAL XERAL COMO FUTURA CIDADE DA XUSTIZA DE VIGO.

1.- A Vicepresidencia e consellería de Presidencia, Administracións Públicas e Xustiza é o órgano da Administración autonómica que ten atribuído o exercicio das competencias en materia de xustiza e no marco do Plan de Infraestruturas Xudiciais, ten previsto levar a cabo as actuacións necesarias para adaptar o complexo do antigo Hospital Xeral de Vigo para acoller a futura Cidade da Xustiza de Vigo, o que permitirá concentrar nun único edificio toda a actividade xudicial da cidade, dando cabida non só as necesidades actuais, senón tamén ás necesidades futuras da cidade de Vigo no eido da Xustiza.

2.- **Antecedentes:** O Colexio Oficial de Arquitectos de Galicia, de acordo co disposto nos seus estatutos, aprobados polo Decreto 293/1999, do 28 de outubro, ten entre os seus fins realizar as prestacións de interese xeral propias da Arquitectura e do Urbanismo que considere oportunas ou que lle encomenden os poderes públicos conforme á Lei.

Así mesmo, os estatutos xerais dos Colexios Oficiais de Arquitectos de España e o seu Consello Superior, aprobados por Real Decreto 327/2002, establece entre as funcións dos Colexios, no seu artigo 7.4 i), nomeadamente “prestar a colaboración que se lles requira na organización e difusión dos concursos que afecten aos arquitectos”.

3.- **Finalidade:** Establecer as condicións de colaboración entre a Vicepresidencia e Consellería de Presidencia, Administracións Públicas e Xustiza e o Colexio Oficial de Arquitectos de Galicia, en particular a través da súa Delegación en Vigo, durante o desenvolvemento do citado concurso de ideas, con intervención de xurado, para a redacción do anteproxecto de adaptación do complexo do antigo hospital xeral como futura Cidade da Xustiza de Vigo, que terá como finalidade a selección da mellor proposta.

4.- O instrumento convencional asinado fundaméntase no seguinte: A Lei 11/2001, do 18 de setembro, de colexios profesionais da Comunidade Autónoma de Galicia, establece no seu





artigo 7.3 que a Comunidade Autónoma de Galicia poderá subscribir convenios de colaboración cos colexios profesionais para a realización de actividades de interese común e para a promoción de actuacións orientadas á defensa do interese público e, en especial, dos usuarios dos servizos profesionais dos colexiados.

Para o desenvolvemento do concurso de ideas cómpre contar coa colaboración do Colexio Oficial de Arquitectos de Galicia, pola súa condición de organismo representativo da profesión de Arquitectura e das súas relacións cos poderes públicos.


5.- A Vicepresidencia e Consellería de Presidencia AA. PP. e Xustiza achegará a cantidade de 6.000,00€ con cargo a aplicación orzamentaria 05.21.131A.622.0 dos orzamentos xerais da Comunidade Autónoma de Galicia para o 2016.

6.- Polo exposto, considérase xustificada a utilización do instrumento do convenio para articular as actuacións de referencia, quedando o dito convenio fóra do ámbito de aplicación do texto refundido da Lei de contratos do sector público, aprobado polo Real decreto legislativo 3/2011, do 14 de novembro, con independencia de que, ao abeiro do previsto no artigo 4.2 da dita norma, lle sexan de aplicación os principios desta lei para resolver as dúbidas e lagoas que se poidan presentar.

É canto se especifica, en cumprimento do establecido na Lei 1/2016, de 18 de xaneiro, de transparencia e bo goberno, así como na *Ley 19/2013, de 9 de diciembre, de transparencia, acceso a la información pública y buen gobierno*, no relativo á publicidade e rexistro dos convenios.

Santiago de Compostela, 15 de abril de 2016

A secretaria xeral técnica



Beatriz Cuiña Barja



DILIXENCIA DE CONSTANCIA

Esténdoa eu, José Ramón Pardo Cabarcos, subdirector xeral de Réxime Xurídico, para facer constar que a memoria que segue, que leva por título *Memoria Xustificativa do Convenio de colaboración entre a Vicepresidencia e Consellería de Presidencia, Administracións Públicas e Xustiza e o Colexio Oficial de Arquitectos de Galicia no desenvolvemento dun concurso de ideas, con intervención de xurado, para a redacción do anteproxecto de adaptación do complexo do antigo hospital xeral como futura cidade da xustiza de Vigo*, é unha imaxe obtida mediante o escaneamento íntegro da memoria orixinal, que foi asinada de forma manuscrita o 15 de abril de 2016.

E para que produza efectos cara a súa inscrición no Rexistro de Convenios do Sector Autonómico de Galicia, asino electronicamente a presente dilixencia.

